

薛文清文集

二一

文清公薛先生文集卷之二

門人關西張鼎校正編輯

賦

黃河賦

吾觀黃河之渾渾兮乃元氣之萃烝濬洪源於西極
兮注天派於滄瀛貫后土之厖博兮杳玄濤之晶明
過積石而左轉兮龍門呀而峻傾薄太華而東驚兮
撼砥柱之崢嶸入大陸而北徙兮迷不辨夫九河之
故形經兩海而紀衆流兮擅浮沉之濯靈覽頽波而
懷明德兮又何莫非妣氏所經營登峴嶴而俯視兮

固彷彿其初迹馭高風而騁望兮遂周游其曲直何
末流之混濁兮始清激而浞浞羌澹灩而徐趨兮勢
汙汙而自得觸險石以闢暴兮訖雷轟而轂擊天宇
擴其沆瀣兮渺上下之玄黃霧雨霏霏而滂集兮混
遂古之洪荒微風蕩拂而渙散兮天機組織其文章
頽焱浩而洶湧兮百恠垂涎而簸揚腥雲濁浪以盪
汨兮恍忽顛倒夫舟航靈曜升而赫照兮乘正色於
中央望舒在御而下臨兮列宿涵泳其光芒若乃震
秉符以行令兮百谷滂滂其凍釋山澤沮洳以上氣
兮增滉漭之洋溢魚龍乘濤以變化兮杳莫測其所

極視融載節以南岳兮雷雨奮達以霧霽潢支流而
殷合兮百川奔而來會木輪囷而漂拔兮蔽雲日而
淘汰狂瀾洶而鬻芹兮塊土焉塞夫衝潰霜戒嚴而
木脫兮少昊執矩以司秋洲渚緬邈而石出兮始殺
湍而安流靈雪紛其四集兮顓頊乘坎以奮神大塊
噫氣而摩軋兮流澌下而龍鱗層冰橫絕而山委兮
河伯驅石以梁津羌險夷而明晦兮變朝暮與四時
颶風起而衝木兮鱗恠駭其難推覩圓方之一氣兮
恒來往而密移昔尼父之歎逝兮跨百世而罕知顧
川流之有本兮與終古以爲期啓龍圖而翫六一兮

悟主宰之所爲。叩余心之未純。兮感道妙之如斯。聊
頌言以自明。兮庶晝夜之靡虧。

虛菴賦爲僉憲泰和劉咸作

觀堪輿之橐籥兮。恒噓炎而吸寒。漠空洞而容納兮。
神化繼出而源源。混真精之微密兮。生人物於兩間。
何此氣之雜糅兮。異明暗與強孱。物擾擾而並進兮。
慨中虛之委填。雖暫空而還塞兮。又何以納夫清言。
聖覽茲之蔽濁兮。啓象告之幽玄。上呀然之澤水兮。
下安安之崇山。山中闢以承澤兮。澤下浸以潺湲。觀
咸虛之受益兮。知中私之可刊。有君子之好古兮。質

清明而粹完窺羲皇而求索兮仰姬孔以援板擊佳
名以爰錫兮寓虛菴而頤頽閭混沌以爲室兮鍵太
素以爲闢列冲澹而爲榻兮鋪恬靜而爲莞幕天宇
之擴落兮鏡止水之澄滂延皓月以爲友兮抱虛明
之團團撫瑤琴而寫中素兮清風去而徐還步逍遙
而徙倚兮悟達人之大觀飲太和而療渴兮味道腴
以充餐佩文史之璜璫兮服禮義之衣冠不先物而
內植兮恒洞達而平寬理無微而不蘊兮善無入而
不安知靜存而動出兮合大化之循環守此度之益
敦兮諒感通之何難顧余質之中窳兮慕夫人之閑

閑願相從於廣宇兮長依倚而盤桓

雪賦

維月之孟陽兮氣栗烈而嚴凝歲忽忽而逝盡兮閔
升降之機局相重陰之蘊杳兮霰雪下而縱橫何玄
冥之工巧兮鏤六出之奇形初揮霍而散漫兮遂漠
漠而無窮乍大荒之微聖兮久川谷而俱盈灑長松
之落落兮玉龍夭矯而騫騰逐回飈而入竹兮磕金
石之琤琤被欽崙之絕巘兮若天吳起立而海波傾
訃城闌之方啓兮敲馬吏之幽宮捲前簾而凝睇兮
懸璣玉於簷楹九臯之鶴橫空而遠逝兮惟聞夫颺然

之長鳴舞瑤臺之佚女兮迷不覩夫綽約之冶容疑
地媼之効瑞兮珎璧磊落而晶瑩豈清都紫微之旣
春兮梨花飛絮而交零載瑤車而駕玉虬兮將遠觀
夫九野與八紘遵渤澥而東騫兮涉萬里之滄溟登
九疑而瞰南極兮祝融不炳耀其銛鋒循流沙而涉
弱水兮歷崢嶸之長冰臨大漠而曉中土兮山川紆
曲而齊同天地混融而爲一兮又孰別夫濁與清乃
旋轉而息駕兮獨恍恍於中庭四方上下皆在我闥
兮橫靈府之宏澄探元化於終古兮聊向風而抽情
亂曰洪鈞幹運一氣孔道兮四時相沓而翕闔何由

兮陽以陰肅恩若仇兮閒寂無餘而發爛莫收兮重
牢降伏三白肇休兮歲薦若茲我將何求兮

自脩賦

皇降予以衆美兮實清明而粹全胡賦質之不猶兮
乃蔽昧而強聾自有識而發憤兮窺前脩之闢關誦
古訓之數數兮服至理之拳拳雖苦心而極力兮猶
未從容乎矩步忽內怛而自脩兮吾知其故善旣復
而或失兮怠與敬其交驚心暫開而或蔽兮理與欲
其紛互此實進退之機兮肇千里於跬步苟決擇之
不勇兮將邪羸而正負蓋必於敬於理而保持兮於

怠與欲其屏去旣經心以自明兮復誦言以自固庶
成性之存存兮全上天之所賦

思本賦

吾行年之匪少兮胡貿貿而靡思善惡原於杪忽兮
寢千里其遠而水油油而上聳兮波汙汙而載馳托
后土之鴻厖兮本大化之無涯肇總總之衆物兮咸
資始於天淵矧含靈之物秀兮孰有不自其先先昭
列而在上兮子孫繩其在下或一日而不思兮將原
竭而本仆或廣植而不食其穫兮或勤施而不責所
負渺河流之汪洋兮濶實漸於遐土啓我人以坦途

兮闢我人以大戶既登名於薦書兮復顯仕於朝列
念積累之艱難兮恒拳拳而恐失服聖賢之明訓兮
索衆妙於微賸仰皇吳之賦畀兮保天理於晷刻謹
余識之昭昭兮匪他岐之敢惑潔余身之皓皓兮豈
外物之能涅是惟顧本源以自脩兮若見親於羹牆
行斯百而靡虧兮體毫髮而匪傷堅此志之罔替兮
愛此言之不忘敦忠孝而日新兮歲末盛而流長

古詩

禱雨効韓體

盛夏將幾月亢旱何赫炎山澤不通氣水雷更深潛

畢亦無所爲徒聞掛鉅璫豐隆久音默列缺寧窺覘
螻蟻閑深穴老蛟遯幽潭凡此衆陰類畏避何安恬
而獨哆口箕簸揚助飛廉微雲稍欲布驅逐無毫纖
陰氣歟將合極力故攪擗蓬蓬太虛內日夕恣併煎
旣迎望舒轡復送羲和駿遂使平田中百物如燒燂
吏民紛祈禱土梗空巍若擊鼓神弗聞旱氣轉覺添
焚巫果何計暴尫信虛談我欲款上帝上訴箕風讒
狂吹旣清息長舌亦收緘得使陰陽和坐見雨露霑
枯槁總滋遂沛澤皆濡淹室家合飽足兒女無譴譎
永荷神力慈式歌大化覃抱此雖自奇臨期復凝瞻

蔬一齋爲柳克新賦

靜觀一理大寨圓竟難言惟於流行際特達見本根
胡爲岐路雜靈妙日已昏玄聖發曾子濂溪啓程昆
後哲總超悟殊途集同門吾友展禽裔古道性所敦
乃作蔬一齋游處資操存極力屏群欲篤志收奇勛
歛茲義理微莖彼枝葉繁始知千萬緒無不會心源
了此匪爲易仰視有蒼玄

舞陽阻雨留宿

清曉發昆陽綠野散朝旭夾道禾黍長泥濘淹馬足
東行得平岡舞陽忽在目入自西郭門兩街喜多竹

爽氣拂征衫清風颭鳴玉便覺人境偏似有太古俗
阻雨留憲臺倏忽經再宿永日覽圖書清宵散華燭
念此居處崇內顧王程速敢不勉忠勤而胡遂安欲
此邑足名賢王常韓常炳相續明發登前途回首憶
高燭

宿信陽慈氏寺有懷趙侍御二首

禪室絕清灑夜景何寥寥白月墮簷隙涼飈拂林梢
有客不能寐起坐心勞焦所懷同心友相去一何遙
開門望天宇露冷河漢高恨無雙羽翰奮飛共遨遊
秉燭遂至旦詩成還獨謠

山寺月皎皎流光入簾帷神清不成寐起視夜何其
天漢漸回轉參斗亦西移庭草滋繁露林竹生涼颼
撫景念良友渺在天一涯會面曾幾日成此遠別離
冉冉易寒暑悠悠隔山陂豈無他人好中情詎能知
所願得懽晤以慰平生思

舟行野湖中

湖水與天平波濤亦何壯我舟駕長風遠破萬里浪
玉節方在斯百恠誰敢傍明登岳陽樓八荒應在望

疊前

少小心好奇斯遊歲方壯雲帆拂遙天畫舫壓高浪

青山歷歷過，可見不可傍。明泊洞庭湖，還當極遐望。
龍陽山行遇雨二首

楚山饒古木，楚水遶奇石。林霏暗不開，石瀨瀉何急。
久行路欲迷，嵐雨互蒸濕。陟降童僕勞，竟日未遑息。
向晚落葉多，攬轡更駐立。

歲晚山行深，山中水重疊。叢篁夾溪橋，橋斷橫槎接。
陰雨竟連朝，雲林黯一色。虛風忽冷然，蕭蕭墜黃葉。
撫景復何爲，內顧遠遊客。

宿山亭

山深郵舍孤，入門晚色靜。四顧足喬林，蕭蕭北風勁。

向夕起重霏，窻戶倏已暝。燃松代秉燭，明暗光靡定。
草草具杯酌，何暇梨菓飮。乃知山林趣，足發遠遊興。
天明登前山，清風滿蘿逕。

瀟湘八景

余少時聞瀟湘八景之清致，而未得一遊。
也。今年冬來湖南，始得親歷而詳覽之。遂
爲八詩以寫其趣。

山市晴嵐

雨來萬壑昏，雨過千山出。晴旭楚人家，蛾眉畫生綠。
看看如有情，餘光遠相逐。